

Na osnovu člana 27. stav 4. Zakona o zaštiti kulturne baštine ("Službene novine Kantona Sarajevo", broj 2/00), na prijedlog Kantonalnog zavoda nadležnog za zaštitu kulturne baštine, ministar kulture, donosi

PRAVILNIK

O TEHNIČKIM I KADROVSKIM USLOVIMA ZA VRŠENJE ARHEOLOŠKIH ISTRAŽIVANJA

I - OSNOVNE ODREDBE

Član 1.

Ovim pravilnikom propisuju se uslovi za obavljanje arheoloških istraživanja dobara baštine na području Kantona Sarajevo (u daljem tekstu: Kanton).

Član 2.

Pod arheološkim istraživanjem u smislu ovog pravilnika podrazumijeva se istraživanje, arheološko iskopavanje, te arheološko rekognosciranje teritorije Kantona usmjereno na sakupljanje i izučavanje podataka koji se odnose na istraživanje dobara baštine, kao i na paleontološke i geološke komponente uz njih povezane (u daljem tekstu: arheološko istraživanje).

II - PRIPREMA I PROVOĐENJE ARHEOLOŠKIH ISTRAŽIVANJA

Član 3.

Fotografska, filmska, video i druga snimanja arheološkog lokaliteta ili nalaza mogu se obavljati samo u okviru odobrenih arheoloških istraživanja ili uz posebno odobrenje Kantonalnog zavoda nadležnog za zaštitu dobara baštine (u daljem tekstu: Kantonalni zavod).

U odobrenju iz stava 1. ovog člana obaveznu sadržinu čini svrha u koju se snimljeni materijal može koristiti, kao i ograničenja za njegovo eventualno objavljivanje.

Član 4.

Arheološko istraživanje mogu obavljati domaća fizička i pravna lica pod nadzorom diplomiranog arheologa - voditelja arheoloških istraživanja i drugim uslovima propisanim ovim pravilnikom.

Strana fizička i pravna lica mogu učestvovati u arheološkom istraživanju pod uslovom da lice iz stava 1. ovog člana dobije za to saglasnost kantonalnog ministarstva nadležnog za poslove kulture (u daljem tekstu: Ministarstvo).

Član 5.

Fizičko i pravno lice iz člana 4. stav 1. ovog pravilnika može obavljati arheološka istraživanja na osnovu odobrenja Kantonalnog zavoda, a u skladu sa uslovima propisanim ovim pravilnikom.

Član 6.

Za arheološka istraživanja fizičko i pravno lice iz člana 4. stav 1. ovog pravilnika dužno je podnijeti zahtjev za izdavanje odobrenja Kantonalnog zavoda.

U zahtjevu se navode podaci o mjestu, vremenu, obimu, sadržaju i ciljevima istraživanja, podaci o licima koja će učestvovati u istraživanju, te dokazi o ispunjavanju uslova propisanih ovim pravilnikom.

U odobrenju za arheološko istraživanje određuje se područje na kojem se ono može obavljati.

III - USLOVI ZA OBAVLJANJE ARHEOLOŠKIH ISTRAŽIVANJA

Član 7.

Arheološka istraživanja mogu obavljati fizička i pravna lica iz člana 4. stav 1. ovog pravilnika ako:

- pravno lice obavlja naučno-istraživačku djelatnost ili neku drugu stručnu djelatnost, a fizičko lice ispunjava uslove za obavljanje radova arheoloških iskopavanja i istraživanja;
- imaju obezbijedena materijalna i tehnička sredstva potrebna za obavljanje radova, konzervaciju izvađenih arheoloških nalaza, kao i za uređenje i zaštitu lokaliteta;
- imaju obezbijedenu opremu i instrumente koji zadovoljavaju propisane standarde i bezbjedonosne uslove;
- imaju stručne kadrove za obavljanje istraživačkih radova;
- imaju obezbijedene uslove tehničke zaštite, zaštite na radu, te zaštite u slučaju nesreće na radu.

Član 8.

Fizičko i pravno lice kome se izda odobrenje za obavljanje arheoloških istraživanja može iskopavati stvari koje imaju ili se pretpostavlja da imaju svojstvo dobra baštine, samo uz posebno odobrenje Kantonalnog zavoda.

Član 9.

U odobrenju za obavljanje arheoloških istraživanja ili snimanja iz člana 3. ovog pravilnika, te o početku, prekidu nastavljanja ili napuštanju radova ili snimanja, ovlašteno fizičko i pravno lice dužno je bez odgađanja obavijestiti Kantonalni zavod.

IV - OPREMA ZA ARHEOLOŠKA ISTRAŽIVANJA

Član 10.

Arheološka istraživanja mogu se izvoditi pomoću opreme i instrumenata pogodnih za realizaciju programa istraživanja i kojima se ne mogu oštetiti ili uništiti predmeti istraživanja odnosno arheološki nalazi.

U odobrenju za obavljanje arheoloških istraživanja bliže se utvrđuju oprema i instrumenti pogodni za realizaciju programa istraživanja.

Član 11.

Vrste opreme, instrumenti za rad i zaštitu na radu, te načini obilježavanja područja na kojima se vrši arheološko istraživanje moraju biti u skladu sa posebnim propisima o tehničkoj zaštiti i zaštiti na radu.

Član 12.

Tehnička zaštita, zaštita na radu, te zaštita u slučaju nesreće na radu, provodi se u skladu s propisima i uobičajenim standardima za obavljanje iskopavanja na zemlji.

V - STRUČNI VODITELJ ARHEOLOŠKOG ISTRAŽIVANJA

Član 13.

Arheološko istraživanje vodi stručni voditelj.

Za stručnog voditelja arheološkog istraživanja može se odrediti lice koje ima visoku školsku spremu, završen studij arheologije te iskustvo u organizaciji i provođenju arheoloških istraživanja, stečeno terenskim radom ili odgovarajućim specijalističkim kursom.

Stručni voditelj arheološkog istraživanja dužan je voditi uredno i svakodnevno dnevnik radova.

U dnevnik radova unose se svi podaci o istraživačkim radovima i o dnevnim događajima koji su od značaja za ostvarivanje programa istraživanja.

Član 14.

O rezultatima arheološkog istraživanja i konzervaciji iskopina i izvađenih predmeta, fizičko i pravno lice koje obavlja arheološko istraživanje dužno je podnijeti izvještaj Ministarstvu.

U prilogu izvještaja dostavlja se na uvid Ministarstvu inventarna knjiga, te osnovna nacrtna i foto dokumentacija.

Lice koje je dobilo odobrenje za snimanje iz člana 3. ovog pravilnika dužno je po završetku snimanja jednu neiskorištenu kopiju snimljenog materijala s pripadajućom dokumentacijom predati Kantonalnom zavodu za zaštitu dobara baštine.

VI - PRELAZNE I ZAVRŠNE ODREDBE

Član 15.

Sva pravna lica koja su se do stupanja na snagu ovog pravilnika bavila ili provodila arheološka snimanja ili istraživanja obavezna su da usaglase odredbe svojih općih akata (statuta, pravila i pravilnika) sa njegovim odredbama u roku od tri mjeseca od dana njegovog stupanja na snagu i dostave ih Ministarstvu radi pribavljanja saglasnosti na njihove odredbe.

Član 16.

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 12-03-40-815/01
21. aprila 2002. godine
Sarajevo

Ministar
prof. **Gradimir Gojer**, s. r.